

A. Fotoam-pahoriana sy fanafahana.

- ❖ “Fiovana lehibe no hitranga tsy ho ela eto amin'izao tontolo izao, ary ho vetivety ny fisehoan'ireo hetsika farany” (EGW, TI9, 11). Inona avy ireo toe-javatra ireo?
 - **Apok. 22:11.** Vita ny fitsarana ary tapaka ny ho anjaran'ny rehetra. Mikatona ny varavaram-pahasoavana.
 - **Is. 8:21-22; Jer. 30:7.** Fotoam-pahoriana. Ny ratsy fanahy hanao ratsy tsy voafetra, ary ny marina tsy mahalala na voavela ny helony na tsia.
 - **Apok. 15:7-8; Sal. 27:5.** Hilatsaka amin'ireo tsy mibebaka ny loza 7 farany. Ambenana sy arovana ny vahoakan'Andriamanitra.
 - **Apok. 16:14; 1Jao. 3:2-3.** Samy miomana hihaona amin'i Jesosy ireo antoko tsirairay. Misy ny hiady Aminy; ny hafa kosa handray Azy amim-pifaliana.
- ❖ Rehefa mamarana ny asa fanelanelanana ataony i Jesosy ary miala amin'ireo tsy mibebaka ny Fanahy Masina, dia ho voaisy toambo-kase ny anjaran'ny tsirairay. Hitohy hahazo ny fanampian'Andriamanitra sy ny fiarovany ireo mahatoky, fa ny ratsy fanahy kosa ho eo am-pelantan'ny Satana. Samy haneho amin'ny toetrany izay nanaphany hevitra fa hotompoiny ny tsirairay.

B. Fotoana ny horohoro sy fifaliana.

- ❖ Ny ratsy fanahy (Apokalypsy 6:16):
 - Nolaviny ny Lalàn'Andriamanitra; nolavin'izy ireo ny loharanon'aina ka nihady “lavaka mitriatriatra” ho an'ny tenany izy (Jer. 2:13). Ankehitriny dia mifanatrika amin'ny Mpitsara izy ireo. Fahatezerana sy fanamelohana ihany no azon'izy ireo antenaina. Iza no hanafaka azy ireo? (Is. 2:19; Apok. 6:16).
- ❖ Ny voavotra (Isaia 25:9):
 - Nahatoky tamin'ny Lalàn'Andriamanitra izy ireo. Nisotro teo amin'ny ranon'aina (Apok. 21:6). Ankehitriny dia mifanatrika amin'ny Mpitsara azy izy ireo. Fanantenana ny famonjena no azony antenaina. Nahoana no tsy hipololotra fiderana izy ireo? (Is. 25:9; Apok. 15:3-4).

D. Fotoam-paharavana sy fitsarana.

- a. Fotoam-paharavana:
 - i. Amin'ny fiavian'i Jesosy, dia hitsangana amin'ny maty avokoa ny olo-masina rehetra hatrizay; ary ny velona izay mahatoky, sady novana, dia hiara-hiakatra amin'izy ireo ho any an-danitra miaraka amin'i Jesosy (1Tes. 4:16-17).
 - ii. Ho faty eo anatrehan'i Jesosy ny ratsy fanahy. Tsy hisy handevina ny fatin'izy ireo, ka amin'ny farany, dia tsy hisy soritra fiainana intsony eto an-tany (Jer. 25:33; Apok. 19:17-21; Jer. 4:23-26; Is. 24:3).
 - iii. Amin'izay fotoana izay, dia voaidy ao amin'ny lavaka tsy hita noanoa mandritra ny arivo taona i Satana sy ny anjeliny, ka tsy ho afaka hamitaka na iza na iza intsony (Apok. 20:1-3).
 - iv. Ny lavaka tsy hita noanoa (abyssos, toerana feno haizina), no mamaritra tsara ny zava-misy eto an-tany amin'izany fotoana izany. Satria tsy misy olombelona intsony eo, dia tsy hisy demonia haka fanahy. Fotoana hisaintsainan'ireo anjely mpikomy izany, izay voafatotry ny rojo vy ny toe-java-misy, tsy afaka ny hiala amin'ny tany efa lao.
- b. Fotoam-pitsarana:
 - i. Raha notanterahina talohan'ny Fiavian'i Jesosy Fanindroany ny Fitsarana, ary efa nampihatra ny didim-pitsarana izy, dia fiainana mandrakizay ho an'ireo izay nino Azy... inona no hevitr'ity fitsarana vaovao ity (Apok. 20:4)?
 - ii. Mandritra ny taonjato maro, dia naneho ny fitiavany ary nanolotra famonjena ho an'izay rehetra te handray izany Andriamanitra. Nahatonga ny faharatsiana hitombo tanteraka koa izany.
 - iii. Mandritra ny Fitsarana, dia afaka manatri-maso ny fahamarinana sy ny famindram-pon'Andriamanitra ny amin'ny fomba nitantanany ny fahotana sy ny fikomiana ny tontolo rehetra sy ireo anjely mahatoky. Ho eo anoloan'izy ireo, amin'izany ny tena vokatry ny fitondran'i Satana: tany foana sy lao.
 - iv. Fa isika izay tany amin'ny tanin'ny fahavalo mandritra ny fifanandrinana, ary voavotra ankehitriny, dia mila manatri-maso ny fahamarinana sy ny famindram-pon'Andriamanitra koa. Amin'ny fitsarana mandritra ny arivo taona dia ho resy lahatra tanteraka ny amin'ny fitiavan'Andriamanitra isika fa tsy hiverina intsony ny ratsy (Nah. 1:9).

E. Fotoana ny fiainana sy fahafatesana.

- ❖ Rehefa tapitra ny arivo taona, dia hatsangana amin'ny maty ny ratsy fanahy. Hanaiky ny fitarihan'i Satana indray izy ireo, ary hiady amin'Andriamanitra sy ny olo-masina. Tsy misy zavatra niova, fa levon'ny afo avokoa izy rehetra (Apok. 20:5-9).

- ❖ Fa mialoha ny fandranganana azy ireo dia hisy fitsarana farany. Sokafana ny boky, ary hanaiky ny asa nataony sy ny fandavany ny antsom-pitiavan'ny Fanahy Masina ny rehetra. Hanaiky ny rariny ataon'Andriamanitra ny rehetra, ka hilefitra eo anatrehany ny lohalika rehetra (Apok. 20:11-13; Is. 45:23; Fil. 2:10).
- ❖ Lavitry ny fiainana mandrakizay (famaizana mandrakizay), fa iharan'ny “fahafatesana faharoa” izy ireo, izay tsy hisy fitsanganana amin'ny maty intsony (Apok. 20:14-15; Sal. 37:20; Mal. 4:1; Is. 26: 14).
- ❖ Foana ny fahafatesana sy ny ota. Fotoana famafana ny ranomaso rehetra izao ary hankafizana fiainana mandrakizay sy mahasambatra (Apok. 21:4).

F. Fotoana hitiavana sy ho tiavina.

- ❖ Ary inona no hataontsika any amin'ny Tany Vaovao mandritra ny mandrakizay?
 - Ny hazo fijalian'i Kristy no ho fianarana sy ho anton-kiran'ny voavotra mandritra ny mandrakizay manontolo.
 - Eo amin'ireo lohasaka mandry fahizay ireo, eny amoron'ireo rano velona no nahita fonenana ny vahoakan'Andriamanitra [...]
 - Hibanjina ny hery mahagaga nahariana izao rehetra izao ny voavonjy
 - Hivelatra ny fahaizana rehetra, ary hitombo ny talenta rehetra
 - Tsy hanasatra ny saina na handany hery ny fitadiavam-pahalalana
 - Ho tanteraka ny fikasana miezinezina indrindra; ho tratra ny zava-kendrena ambony indrindra, ho tanteraka ny faniriana ambony indrindra.
 - Mbola hisy ihany tendro vaovao hotratrarina; zava-mahagaga vaovao hahalina; anton-javatra vaovao hampiasana ny herin'ny saina sy ny fanahy ary ny tena.
 - Mizara [amin'ny voary tsy lavo] ny harem-pahalalana sy ny haren-tsaina azony nandritra ny andro rehetra nifandimby teo am-pandinihana ny asantanan'Andriamanitra izy
 - Tsy misy manamaloka ny fijeriny eo am-pitazanana ny voninahitry ny famoronana – ny masoandro, sy ny kintana ary ireo vondron-kitana, samy mandeha manodidina ny seza fiandrianan'Andriamanitra (Notsongaina to amin'ny “Hery Mifanandrina” p. 677-702-704-705)